



Harald Bianco  
Inatsisartuni ilaasortaq, Inuit Ataqtigiit

**Akissuteqaat, § 37 naapertorlugu apeqquteqaatinut, - 106\_2021**  
**Adventureefterskole\_HBIAN**

19-08-2021  
Sagsnr. 2021 - 14434  
Akt nr. 17564261

Asasara Harald Bianco,

Postboks 1029  
3900 Nuuk  
Tlf: +299 34 50 00  
Email: ikin@nаноq.gl  
www.nanoq.gl

Apeqqutinnut Inatsisartut suleriaasianni aalajangersakkat naapertorlugit saqqummiussannut qujanaq. Taakkua uani ataani akissuteqarfigissavakka.

**1. Tunumi (Tasiilami) Efterskolimi pilersitsisoqassagaluarpad tamanna qanoq akeqarnissaa ilimagineqarsinnaava?**

**Akissut:** Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik paasiniaasimavoq Ineqarnermut, Attaveqaqtigiinnermut Naligiissitaanermullu Naalakkersuisoqarfimmud Tasiilami efterskolimik pilersitsisoqarsinnaaneranut aningaasartuutaasinnaasut pillugit.

Efterskolimik Tasiilami pilersitsineq ilinniartunut 70-inut inissaqartitsiviusumik missiliunneqarsimavoq nunatta karsianut minnerpaamik 158 mio. kr.-inik aningaasartuuteqarfiusussatut, pilersitsinerud aningaasartuutaannaat eqqarsaatigalugit. Taamaattoq Naalakkersuisut malugeqqussavaat akinut tunngatillugu misilittakkat pigineqartut taamaallaat tunngavigalugit missiliuusiad pineqarmata, akit eqqorluartut naatsorsuisoqarsinnaanngimmat suliniutissamik allaaserinnillunilu titartakkanik sanaartugassanut siumoortumik pilersaarusiortoqareertinnagu. Tamatumalu saniatigut naatsorsuutigisariaqassaaq sulisut inissiassaannik arfineq pingasuniit qulit angullugit efterskolimi sulisuusussanut pisariaqartitsisoqarnissaa.

Nunatsinni aningaasaqarnikkut maanna inissisimaneq isiginiarlugu Naalakkersuisut piffissami matumani pilersaaruteqanngillat Tasiilami efterskolimik pilersitsinissamut.

Naalakkersuisullu ilutigisaanik ilisimavaat nunatsinni siusinnerusukkut suliniuteqartoqarnikuunera misissuiniarluni timersornerud efterskolimik namminersortuniit pilersitsisoqarsinnaanera eqqarsaatigalugu. Naalakkersuisut suliniutit taamaattut tikilluaqqaat neriuutigalugulu taamaattut siunissami inuusuttatta efterskoleqarnikkut qinigassaqaqarnerulernissaannut aqutissiuussiumaarneri.

**a) Taamatullu pilersitsisoqassagaluarpad ingerlatsinerud qanoq aningaasartuuteqartoqarnissaa ilimagineqarsinnaava?**

**Akissut:** Aningaasaliissutit efterskolimik ingerlatsinerud immikkoortinneqartartut, Villads Villadsen-ip Efterskolianut aamma Maniitsumi Efterskolimut takuneqarsinnaappud aningaasanut inatsimmi kontumi 40.10.06. Tamatuma saniatigut naatsorsuutigineqassaaq ilinniartut angalanissaannut aningaasartuuteqarnerunissaaq 1,2 mio. kr.-it missaannut missiliunneqartunik aningaasanut inatsimmi kontumut 40.10.12-imut ilassutaasariaqartunik.

Inussiarnersumik inuulluaqqusillunga

Peter Olsen